

E ta entre otro fundador di e compania R.E. Yrausquin & Sons na Korsou

DON RUBEN YRAUSQUIN A FAYECE

STA. CRUZ – Don Ruben Yrausquin tabata entre otro fundador di loke nos conoce awe como R.E. Yrausquin & Sons, agencia di autonan marca Ford y Mitsubishi na Aruba. Diamars ultimo sr. Ruben Efrain Yrausquin, naci na Aruba dia 22 di November 1916 a fayece na Aruba na edad di 91 aña, despues di un lucha largo cu su salud. Nos ta referi aki na e tata di Rubencito Yrausquin q.e.p.d. y abuelo di e rumannan Yrausquin cu awendia ta manehando R.E. Yrausquin & Sons.

Un aña prome cu e Prome Guera Mundial, Ruben a nace na Aruba den e cas unda cu añanan despues Club Tivoli a establece su mes. Den e temponan difícil di guera, su mayornan tabata dividi nan bida entre Aruba y Puerto Cumarebo na estado Falcón, Venezuela. Ta pa e motibo aki e mucha homber chikito aki a pasa su prome añanan den e poblacion Venezolano unda cu el'a asisti school hunto cu su rumannan Fernando y Alexis. Ruben Yrausquin tabata tin solamente 5 aña ora cu su ruman Harold a nace y su tata Efraín a muri tragicamente. Don Ruben Yrausquin, maneranan tabata yame a cuminza su bida di comerciante na edad hopi hoben. Na edad di 7 aña el'a cuminza bende bals, limpia zapato y despues cuminza bende zapato aki na Aruba. E tempo ey hacimento di negoshi no tabata facil y mester a pasa trabao pa bende Bo productonan. C i r c u m s t a n c i a n a n sin embargo a pone cu na un dado momento e famia mester a muda y a bay biba na Curaçao, na Otrabanda. Aki Ruben a drenta e mundo comercial trahando como bendedor den e negoshi di su primo Augusto Damian Jonckheer, cu tabata ubica dene "begane grond" di Hotel Americano. E no a conforma su mes cu su ingresonan ora cu el'a haya sa cu tabata tin

un inventario grandi di Keds cu no tabata bendiendo bon y Ruben a sigura su primo cu e si lo por bende nan. Ruben a huur un pickup y cu esaki e a core henter e caminda cu ta yega West Punt te ora cu el'a bende henter e inventario, sea ta na cash of na credito. E prueba di aspiracion, abilidad y perseverancia tabata suficiente pa su primo Augusto yude pa habri e tienda Vogue. Unda cu e tabata hole e posibilidad di haci un negoshi, eynan bo por a haya e hoben Ruben, yen di optimismo y sugeriendo alternativanan y ofreciendo pa e participa den e negoshi tambe. Un biaha Ruben a involucra su mes den un negoshi pa hiba cahanan di morto di Venezuela pa Curaçao, despues di a supera hopi obstaculo, a logra pa descarga esakinan na Curaçao. Te eynan, tur cos a bay bon te ora cu nan a ripara cu e cahanan tabata traha pa e tamaño di Venezolanonan pero nan tabata hopi chikito pa e defuntonan na Curaçao. E actividadnan comercial di Ruben no tabata limita na Curaçao so. Den e decada di añanan 40, un gran amigo di famia yama Don Elías Mansur tabatin un tienda grandi yama Mansur Trading; Don Elias a ripara e abilidadnan superior di Ruben y e relacion aki a sirbi como un gran experiencia pa e hoben y Don Elias a bira socio cune den un negoshi di paña na Curaçao. Mester menciona cu na aña 1952 el'a cuminza cu e negoshi di auto R.E. Yrausquin & Sons na Curaçao. Tempo cu el'a cuminza, tur loke e tabata tin tabata hopi gana di traha duro y tambe conocimiento di negoshi. Ta cu e unico propiedadnan ey el'a cuminsa cu su compania, tumando over e agencia di e marca Ford pa e mercado di Curaçao. Mester menciona cu e tempo ey e marca tabata pasando den momentonan difícil y tabata carece di suficiente promocion. Ford

tabata tin mester di un bon empuhe, debi cu e aña prome nan a bende solamente 1 auto. Aunke cu den e tempo ey, venta di auto general tabata hopi abao mes....mayoria hende tabata prefera di cana envez di compra un auto nobo. Pero segun e economia a bay ta creciendo, combina cu e trabao duro di Ruben Yrausquin, su negoshi tambe a evoluciona. Crecemento di e mercado no a bay facil den e añanan ey pasobra e mercado tabata diferente cu awor. Por ehempel, banconan no tabata financia auto y como tal Don Ruben a dicidi cu R.E. Yrausquin & Sons mes lo haci esaki.

Don Ruben a pasa den hopi tempo durante su añanan den negoshi, pasobra despues di a lanta diferente compania for di tera y ata e fecha 30 di Mei 1969 a bati na porta. Apenas el'a drenta den su edificio nobo na Saliña cu su agencia di auto, Botica Brion & Botica Americana, pacus di paña y hasta un negoshi conoci como "Discoteca Brion". E sucedidonan e tempo ey a causa cu tur su negoshinan a kima por completo, el'a perde tur cos y mester a cuminza completamente di nobo atrobe. E unico cos cu a reste e tempo ey tabata su experiencia y bon reputacion. Ta na e momentonan ey cu e comerciante a tuma e marcanan Mercury y Lincoln tambe over pa asina hunto cu Ford hiba e compania na e siguiente nivel. Algun aña despues el'a bin descubri cu e agencia di Ford na Aruba tabata na venta y mesora a compra esaki. Asina Don Ruben a tuma Carib Motors over y a hink'e den mannan di su yiu Rubencito Yrausquin q.e.p.d. cu despues di hopi aña a cambia e nomber pa R.E. Yrausquin & Sons pa por sigui cu e tradicion di famia. Ruben Yrausquin Sr. mes a dicidi di tuma su trabao mas trankilo despues di esey y na inicio di añanan 90 a bende

R.E. Yrausquin & Sons na Curaçao mientras cu aki na Aruba a pasa e compania over completamente den mannan di su yiu Rubencito Yrausquin q.e.p.d. Awendia e tercer generacion di famia Yrausquin ta manehando e agencia di autonan Ford y Mitsubishi na Aruba. "Abuelo semper a keda pendiente di nos y tabata cla pa un consejo. Mi ta masha orguyoso di por a siña hopi di dje. E ta bini di e generacion cu no tabata tin tanto posibilidad manera nos tin awendia, y a demostra cu trabao duro y dedicacion ta paga. Nos lo sinti su falta hopi", asina Juan David Yrausquin a bisa. Ruben Efrain Yrausquin a haci hopi riba diferente tereno y como tal a ricibi un condecoracion di S.M La Reina. E tabata consul honorario di Spaña na Curaçao y a ricibi tambe un condecoracion real di Spaña. Su trabaonan diplomatico no a keda limita solamente na Curaçao, pasobra aki na Aruba el'a sirbi tambe como Consul di Venezuela. El'a ricibi dos condecoracion presidencial di Venezuela, esta e Orden Francisco de Miranda den su Primera y Segunda Clase. E ta e

Presidente Honorario tambe di Sociedad Bolivariana na Curaçao. Su entiero lo tuma lugar na Curaçao. Su deseo ta pa dere banda di su di dos señora cu a fayece na aña 1989. Aki na Aruba lo tin posibilidad pa duna condolencia awe diabierna 19 di September for di 7'or pa 9'or na Caya Frere Alexius 5. E ceremonia di despedida lo tuma lugar diasabra atardi entre 2'or pa 4'or durante un santo sacrificio di misa na Misa San Francisco na Oranjestad.

